

Nua studegiar scolast secundar per instruir rumantsch?

La furmaziun da magisters e las professuras rumantschas

CUN RICO CATHOMAS HA DISCURRÌ
CLAUDIA CADRUVI / ANR

■ **Gia suenter dus onns smetta la Scol'auta da pedagogia a Son Gagl cun la purschida da rumantsch per magisters secundars. Il motiv: strusch annunzias. Rico Cathomas è stà docent per didactica rumantscha a Son Gagl.** Tenor el stuess il chantun Grischun fixar a moda clera las pretensiuns da la furmaziun per magisters che studegian rumantsch. La furmaziun da magisters secundars stat en stretg connex cun las professuras rumantschas a Turitg e Friburg. Pertutgant la successiun dal professor da rumantsch *Georges Darms* a Friburg pledescha Cathomas da ristgar in model innovativ.

Nua cussegliaissas *Vus ad in giuven che vul daventar magister secundar dad ir a studegiar, sch'el less pli tard instruir rumantsch?*

Rico Cathomas: Quai è vairamain ina greva dumonda per il mument. Nus avain tant a Son Gagl sco a Friburg vacanzas. Da gliez ennà stuess ins dir ch'igl è pli stabil da studegiar a Turitg.

Vus cussegliaissas al giuven dad ir Turitg?

Gea, per il mument bain. Jau sper ch'i dettia cun il temp anc ina schliaziun a Friburg. Tgi sa tge ch'il futur porta? Ma tgi che vul far la segira sto ir a Turitg.

Il chantun sto pretender standards minimalis

Il giuven po dentant era simplamain studegiar auters roms e tuttina instruir rumantsch, pertge i regia stgarezza da magisters secundars.

Quai è deplorablmain vair. Da l'otra vart èsi gea gist ina schanza per insatge che sa rumantsch. Nus avain effectiv la problematica: Dad in maun stuess ins cuntanscher in tschert dumber da puncts durant il studi en ils singuls roms e da l'otra vart exista l'uschennumnada «normative Macht des Faktischen». I dat blers scolasts ch'instrueschan rumantsch senza avair studegià la lingua. Quai n'è dal reminent betg mo la problematica dal rumantsch, mabain exista er en auters roms. Ins vesna adina puspè che magisters dattan gymnastica che n'han mai studegià sport.

Ma tar il rumantsch è il problem pli accentuà.

Gea, schizunt fitg acut.

Tge è sa midà a las universitads dapi che *Vus sez* avais studegià?

Jau hai studegià pedagogia, psicologia e scolast gimnasial a Friburg. Ozendi na datti betg pli questa pussaivladad da studegiar a moda libra cun pais individual. Ils students han il squitsch da far puncts. La structura dal studi è vegnida scolarisada. I vegn dà avant tge ch'igl è da far. I dat il chatsch sin puncts. Sa midà è era l'attaschadad envers ina università. Pli baud eri cler ch'in Sursilvan gieva a Friburg. Oz n'han ins



Il psicolog, pedagog e didacticher Rico Cathomas terminescha cun quest semester ses engaschi a la Scol'auta pedagogica a Son Gagl. El instruescha anc a Bulaun en il Tirol dal sid.

FOTO C. CADRUVI

betg pli questa attaschadad. Mintgin va nua ch'el vul. Ed era cura ch'el ha studegià na turna el betg pli directamain en il chantun.

Tge duess il chantun Grischun far per meglierar la furmaziun da magisters secundars rumantschs?

Il chantun duess pretender in tschert dumber minimal da puncts da credit ch'ins sto cuntanscher. Sch'i exista per exempel cunvegns cun Son Gagl che gia diesch puncts bastian per dastgar instruir rumantsch en scola secundara metta quai sut pressiuin las autras scolas ed universitads che pretendaN 30 puncts u dapli. Là stuess il chantun Grischun esser pli consistent e pretender standards minimalis che vegnan tegnids en.

Quants puncts duess il chantun pretender per magisters da rumantsch? Minimalmain 30 puncts?

Quai è il minimum. Pertge era cun 30 puncts na pon ins betg far in studi approfondì. Er en auters roms vesan ins la pratica da minimalisar las prestaziuns dals students. Son Gagl per exempel porscha ina scolaziun da magister secundar cun trais u quatter roms, tscherrens studegian schizunt tschintg. Ma cun tschintg roms na pon ins prest betg pli pretender 60 credits ch'i dovra per studegiar da radent in roms.

Professura a Friburg – ins sto ristgar insatge

Vus essas uss stads dus onns docent per didactica rumantscha a la Scol'auta pedagogica a Son Gagl. Tge experiensas avais *Vus fatg?*

Cun ils students hai jau fatg ina buna

experienscha. Structuralmain da main. Da princip hai jau beneventà fitg che Son Gagl ha empruvà da far ina purschida rumantscha. En l'emprim onn avain nus gi tschintg students. Nus avain rimnà tuts students rumantschs ch'eran gia a Son Gagl, students da tuts idioms. Igl è stà in onn fantastic. Ils students eran top-motivads e nus avain in bun clima. La Scol'auta pedagogica ha pensà ch'ins haja uschia creà in basegn ed ha – para en atgna reschia – dumandà il chantun Grischun per sustegn finanziàl. Quel n'han ins dentant betg survegnì. Il chantun Grischun ha motivà che la purschida a Son Gagl concurrenzieschia las purschidas a Turitg e Friburg.

Ha la Scol'auta pedagogica a Son Gagl fatg in exercelzi dad alibi per guadagnar dapli students grischuns?

D'alibi sa chapescha betg. Igl è stà in'emprova da s'establi sin la fiera sco terza forza. La Scol'auta pedagogica grischuna na po gea betg porscher ina scolaziun per scolasts secundars. Son Gagl fiss stà pli datiers dal Grischun. Quai è stà la strategia.

Il studi da rumantsch munta ina garanzia sin ina piazza

Che n'è betg gARtegiada.

Quella n'è segir betg grategiada.

Ils students che frequentan rumantsch n'èn betg mo stgars en las scolas pedagogicas, mabain er en ils curs da rumantsch a l'Uni da Friburg u per part er a Turitg.

Igl è ina tscherta tragedia ch'ins ha duas sedias e strusch students. Uschiglio èsi gea il cuntrari ed ins ha memia blers

students. Igl è donn ch'i na vegn betg tratg a niz meglier las purschidas rumantschas.

Ina grupp da lavur emprova da mantegnair la purschida rumantscha a Friburg suenter che *Georges Darms* va en pensiuin. Tge pensais *Vus?*

Igl è da beneventar ch'ins emprova da mantegnair la professura – betg mo ord raschuns istoricas, mabain per il mantegniment dal linguatg. Forsa stuess ins dentant ina giada chattar novs concepts, concepts pli innovativs.

Pli baud eri cler ch'in Sursilvan gieva a Friburg

Sch'ins dess a *Vus l'incumbensa d'elavurar in concept. Co vesses quel ora?*

Jau crai propi ch'ins stuess gughegiar dapli. La moda existenta, da simplamain puspè metter in nov professur sco fin qua, n'è gea betg sa cumprovada. Pertge lura avain nus adina puspè il medem problem sch'in professor chala. Ins dastgass ristgar insatge pli innovativ – ina professura che sa reparta sin differentas personas cun differentas funcziuns. Ina professura cun muntada naziunala. I stuess dar sco in center da cumpetenza per il rumantsch. Ins pudess lavurar cun meds novs, per exempel models da blended learning, nua ch'ins instruescha sin distanza. Probabel fissi era da schlargiar il spectrum dal studi da rumantsch.

Co pudess ins schlargiar il studi da rumantsch?

Nus Rumantschs essan gea experts da plurilinguitad, da minoritads e da medias. Nus avain er ina buna infra-

structura cun il Radio e la Televisiun Rumantscha. Sper la lingua e la litteratura pudess ins era tractar quests champs u champs da la sociologia u dal dretg da minoritads. En tut quests secturs posseda la Rumantschia experts bainscolads. Cun quels pudess ins crear in gremi che porscha in studi rumantsch pli vast.

Empè ch'ina suletta persuna occupa ina professura pudessan plirs experts sa baratar cun l'instrucziun.

Forsa dessi ina furma da professura, ma cun pliras personas ed instituziuns, per exempel era cun il Dicziunari Rumantsch Grischun. Nus avain uschè interessantas instituziuns cun las qualas ins pudess collavurar – cun blended learning u cun curs en blocs ordaifer il temp uffizial da semester. Sco minoritad ston ins esser flexibel e betg esser en concurrenza directa cun il mainstream. Questa experienscha hai jau fatg ils ultims onns era sco docent a Bulaun, nua ch'jau instruesch mussadras da scolletta dal ladin. Jau hai savens fatg curs il venderdi e la sonda/dumengia u per part curs en blocs d'in emna. Nus avain gi buns ecos. Ils students eran motivads. Ins sto propi ristgar insatge. Il pled «ristgar» è in pled clav. I fiss giavischabel da prender in tschert ristg concepiun.

Cun ils students hai jau fatg ina buna experienscha

Pertge duess in student ozendi tscherer il rom da rumantsch a l'università u a la scol'auta da pedagogia?

Igl è in studi fitg vast, fitg interessant ed ins ha anc il contact direct cun il professor. Suenter in studi da rumantsch han ins enorm bunas schanzas sin la fiera da lavur. Tgi che ha studegià rumantsch posseda cumpetenzas cun las qualas el ha quasi ina garanzia d'obtegnair ina piazza.

Scolast secundar – studi a Turitg

Tgi che studegia magister secundar a la Scol'auta pedagogica a Turitg e less ina furmaziun rumantscha po frequentar il rom a l'Universitad a Turitg. Là vegnan purschids curs da litteratura e linguistica rumantscha. «Da preschent avain nus tschintg students che frequentan il rom rumantsch», di *Esther Kamm* da la Scol'auta pedagogica a Turitg. «Damai che nus avain uschè in pitschen dumber da students n'avain nus fin uss betg pudì porscher rumantsch sco rom cumpain ensemen cun curs da didactica specifica.» Er en il rom da talian existia il medem problem cun paucs students. Ils students da rumantsch hajan dentant per regla anc autras linguas, per exempel ils roms da tudestg u englais. En la rama da quests roms frequentan els curs da didactica da lingua.